

# Ampox carta xato'as judíosliajwa, Jesús pejwɨajan naexasitiliajwa

---

**Dios to'apox paxulan, japon naewɨajnalijwa jiw**

**1** Chajiakolaxtat Dios pin-iaveces xabich buxto'a pejprofetas, japi profetas jumchiliajwapi wajwɨajnapirijiw Dios buxto'aspoxan. Do jawux, profetas naewɨajan wajwɨajnapirijiw Dios buxto'aspoxan. **2** Do baxael, Dios to'a paxulan xatis naknaewɨajnalijwa Dios matabijaliajwas. Chajiakolaxtat Dios to'a paxulan isliajwa ampthat, puexa thatbaxotatpibej. Do jawux, Dios paxulan to'a japon puexa japoxan tataeflaliajwa. **3** Dios paxulan xabich pachaempon. Me-ama pax Dios xabich pachaem, ja-aechbej paxulan. Dios paxulan xajɨp puexa isliajwa jum-aechpoxtat, mamnik xoton. Puexa japon ispoxan ampthatat, athuxotsebej, nakiowa amwɨtjel pachaemsful japon pijaxtat. Dios paxulan tɨp cruztat xatis babijaxan isaspoxan ajilaliajwa Diosliajwa. Jawux chijialison athɨ poxase ekaliajwa pax poklalel, japon suapich, puexa tato'laliajwa.

**Dios paxulan kaes pejme pachaempox,  
me-ama ángeles, jachi-elon**

**4** Dios paxulan kaes pejme pachaem. Me-ama ángeles, jachi-elon. Dios tapaei paxulan puexa tato'laliajwa, japon suapich. Dios tapaeibej ángeles kaesupich tato'laliajwa. **5** Dios jum-aech paxulanliajwa:

“Xam taxulnam. Amwɨtjel puexa jiw matabijaxael xam diachwɨajnakolax taxulnam” —aech Dios. Dios jum-aechbej a sew jiw chiekal matabijaliajwa japon

paxulanliajwa: “Xanlap japon paxnan. Japon xan taxulan” —aech Dios. Dios japox jumchi-el kaen ángelliajwa. Dios japox jum-aech paxulankalliajwa. Samata, matabijas Dios paxulan kaes pejme pachaempon. Me-ama ángeles, jachi-elox.

**6** Dios paxulan to'aliajwa wut ampathatlelsik, jum-aechon ángelesliajwa:

“Xamal puexa brixtat nuilaxaelam taxulan pejwñajnael, sitaeyaxaelam xot” —aech Dios ángelesliajwa.

**7** Dios jum-aechbej:

“Taj-ángeles tajjamechan xananñamspijwaxael asew jiwliajwa. Ángeles pabisla. Me-ama joewa wut, ja-aech. Japibej, me-ama jitkaech-ia'an wut, ja-aech jiw toejafaliajwa, pejbu'wñajanpi xanliajwa” —aech Dios.

**8** Dios jum-aech paxulan jumtaeliajwa:

“Xam Diosnam. Tato'laxaelam pomatkoicha. Xam puexa tato'lam wut, chiekal tato'laxaelam.

**9** Xam nejxasinkam isliajwam pachaempoxan. Xambej nejwesla isliajwam pachaema-elpoxan. Samata, xam makafitx tajaxtat kaes nejchachaemlaliajwam. Me-ama nejnachala nejchachaemil wut, xam jachiyaximil” —aech Dios paxulanliajwa.

**10** Dios pejme jum-aech paxulanliajwa:

“Xam paklonam. Isam ampathat, puexa ajil wut. Isambej thatbaxo.

**11** Puexa xam isampoxan, baxael, paduj nadofaxael. Me-ama padujnaxoe, jachiyaxael japoxan, asamatkoi, puexa toep wut. Pelax xam toepaximil, pomatkoicha dukaxaelam xot.

**12** Me-ama jiw truka padujnaxoe, xambej asamatkoi jakichiyaxaelam thatbaxoliajwa, ampathatliajwabej. Do jawux, pajelthatbaxo, pajelthatbej, xam isaxaelam. Pelax xam, me-ama amwutjel, jachisfulaxaelam pomatkoicha, xam toepaximil xot” —aech Dios paxulanliajwa.

**13** Dios jumchi-el kaen ángelliajwa:

“¡Ekde tajpoklalel puexa jiw tato'laliajwam! Nadaelmajiw malechaxaelen japi xam naexasisliajwa to'axaelampox” —chi-el Dios pej-ángelesliajwa. Pelax Dios japox jum-aech paxulankalliajwa.

14 Puexa ángeles, japi espíritus. Samata, japi taeyaxisal. Japi duil isfulalijwa Dios tato'alpoxan. Japi to'as potuajnucha kaja-chawaeslijwa jiw. Japi jiw Dios bu'weyaxaes.

### Xatis naekuanjiamsaxisalpoX Jesús pejwuanlijwa

**2** Xatis chiekal matabijas Dios paxulan kaes pejme pachaem. Me-ama ángeles, jachi-el Dios paxulan. Samata, xatis naekuanjiamsaxisal, naknaewuan wut chimiawuan, japon pejwuan. Kaes chiekal naexaxisaxaes kofasamatas jarawuan. **2** Chajiakolaxtat Dios pajut buxto'a ángeles, japi charaelijwa Moisés Dios pejtato'laxan, japoxan jiw naewuanlijwas. Do jawux, Moisés japatato'laxan lel. Jiw naexaxis-elpi japatato'laxan, japi Dios kastikas. **3** Samata, xatis naekuanjiamsaxisal chimiawuan, Dios paxulan pejwuanlijwa, xatis Dios nakbu'welijwa. Wajpaklon Jesucristo jum-aech jiw bu'weyaxaelpoX. Japi jiw pajut matabija wut jarawuan diachwuanjakolaxpoX, ja-aech wut, xatisbej japox chiekal naknaewuanpi. **4** Japi jiw, xatis naknaewuan wut, isbejpi koechaxan Dios pijaxtat. Espiritu Santobej kajachawaech japi kaenanula islijwa Dios nejxasinkpoxan. Samata, xatisbej matabijas naknaewuanpoxan, diachwuanjakolaxpoX.

### Jesucristo nalaelt wut, me-ama yamxi nalaela wut, ja-aechpoX

**5** Asamatkoi, ampathat pajelthat wut, jawut Dios tapaeyaxil ángeles tato'lalijwa japathatat. **6** Dios pejjamechan, chajia lelspoX, jum-aech wut, jum-aechoX jiw kaes pejme pachaemaxaelpoxlijwa. Me-ama Dios pej-ángeles, jachiyaxil jiw. Japoxbej Dios pejjamechan, chajia lelspoX, jum-aech wut, jum-aechoX:

“Dios, xam kaes xabich pachaemam. Me-ama jiw, jachiemil. Ja-am wut, ¿ma-aech xotkat xam nakiowa nejchaxoelam jiwlijwa?

**7** Xam jiw isam wut, japi jiw puexa chiekal pachaema-ellejen. Me-ama ángeles xabich pachaem, jachi-el japi jiw. Pe nakiowa, asamatkoi, japi jiw xam chiekal naexasit wut, japi kaes pejme pachaemaxael xamlijwa. Me-ama ángeles, jachiyaxilpi pachaempox. Ja-aech wut, puexa kaes pejme sitaeyaxaesi.

**8** Samata, asamatkoi xam tapaeyaxaelam japi jiw tato'laliajwa puexa isampoxan” —aech Dios pejjamechan, chajia lelspx, japi jiwliajwa.

Dios tapaei wut jiw tato'laliajwa puexa Dios ispxoxan, japi tato'laxael puexa. Tataeflaxaelbejpi. Pe xatis amwutjel tae-esal jiw puexa tato'alpox, tʉadus-el xotfuk. **9** Jesús ampathatat nalaelt wut, kaes xabich pachaempon. Me-ama ángeles, xabich pachaem wut, jachi-el Jesús. Dios naknejxasink xot, paxulan to'a nalaelsliajwa ampathatat, xabich nabijasliajwa. Do baxael, Cristo tʉp xatis babijaxan isaspxoxanliajwa. Samata, Dios tapaei japon ekaliajwase Dios poklalele, puexa jiw tato'laliajwa.

**10** Dios puexa is wut, japoxan japon pajutliajwa. Dios xabich nejxasink japi jiw chiekal naexasisliajwapi japon pejjamechan. Nejxasinkbejpon japi jiw japon pejjiwaliajwa. Nejxasinkbejpon japi jiw chiekal pachaemaliajwa, me-ama Dios pachaem, jachiliajwa japi jiw. Samata, Jesucristo tapaeis xabich nabijasliajwa, tʉp wuton cruztat jiw babijaxan ispxoxanliajwa. **11** Amwutjel xatis babijaxan isaspxoxan ajil xatisliajwa, Jesús tʉp xot cruztat xatisliajwa. Japon pax, xatisbej japon waj-ax. Samata, Jesús bʉxdala-el jumchiliajwa: “Ampi jiw takoew” —chiliajwapon xatisliajwa. **12** Dios pejjamechan, chajia lelspx, jum-aech wut, jum-aechox Jesús jumchiyaxaelpox pax Dios jumtaeliajwa:

“Asamatkoi jumchiyaxaelen, puexa takoew sʉapich, xamliajwa. Puexa takoew sʉapich, natamejlax wut, xanal xabich himno jajuiyaxaelen xam nejchachaemliajwam” —aech Jesús jum-aechpox pax Diosliajwa.

**13** Dios pejjamechan, chajia lelspx, jum-aech wut, jum-aechox Jesús jumchiyaxaelpox pejnachalaliajwa:

“Xan taj-ax, Dios, xanaboejsaxaelen nakajachawaesliajwa” —aechox.

Japafutxot jum-aechbej Jesús jumchiyaxaelpox pejnachalaliajwa:

“Xan amxotx, japi sʉapich, Dios nachaxdutipi sʉapich” —chiyaxaelpox.

**14** Jesús ampathatat nalaelt wut, me-ama yamxi nalaela wut, ja-aechon. Samata, Jesús xajʉp tʉpaliajwa, xatis babijaxan isaspxoxanliajwa. Samata, Jesús tʉp wut, malechapon Satanás. Jiw tʉp Satanás pijaxtat. **15** Jesús tʉp wut, chiekal toep pomatkoicha wajlewlapox tʉpaliajwas. **16** Diachwʉajnakolax

Jesús fúlae-elsik ampathatasik japon kajachawaesliajwa ángeles. Pelax japon fúloek kajachawaesliajwa Abraham pamojiw, japi naexasitpi Dios, me-ama Abraham, ja-aechpi. **17** Samata, Jesús nalaelt ampathatat Dios kawuajnalijwa xatisliajwa. Nakbel-taenbejpon. Iapon Dios to'aspox. Samata, pajut natapaeipon padaelmajiw kimatamatlaliajwas cruztat. Japon tɔp wɔt, Dios nakbel-taen toepaliajwa wajbɔ'wɔajanpox. **18** Jesús nabijat, Satanás xapaejtas wɔt babijax isliajwa. Pe Jesús is-el babijax. Samata, Jesús xajɔp pejjiw kajachawaesliajwa, japibej xapaejas wɔt Satanás.

**Amxotpox jɔm-aechpox Jesús kaes pejme pachaempon,  
me-ama Moisés pachaem wɔt, jachi-elpon**

**3** Takoew, xamal Dios pejjiwam, makanot xoton japon pejjiwaliajwam. Nejchaxoelam wɔt, ¡chiekal nejchaxoelde Jesucristoliajwa, japon Dios to'akas ampathatasik xatis naknaewuajnalijwa Dios pejjamechan! Jesús diachwuajnakolax sacerdotekolan, japon Dios nakwekawuajnalijwa Dios nakka-jachawaesliajwa xatis. **2** Chajiakolaxtat Moisés chiekal tataefɔl puexa Dios pejjiw, Dios japox to'as xoton japi israelitas tataeflaliajwapon. Jesúsbej chiekal is Dios pijax bichax ampathatat. **3** Jesús kaes pejme pachaem. Me-ama Moisés pachaempon, jachi-el Jesús. Jesús kaes pejme xabich sitaens, jiw bɔ'weyaxael xoton, naexasiti japon pejwuajan. Bachan isanbej sitaens. Me-ama japon ba ispox sitaens wɔt, jachi-esal. **4** Xatis bachan taens, jiw isbachan. Pe Dios ampathatat puexa nejmach is. **5** Chajiakolaxtat Dios pajut to'a Moisés chiekal tataeflaliajwa puexa Dios pejjiw. Samata, Moisés chiekal naexasit, Dios to'as wɔt. Moisés jɔm-aechbej asamatkoi Dios jɔmchiyaxaelpoxan jiwliajwa. **6** Cristo, Dios paxɔlan, chiekal naktataeflafɔl, Dios pejjiws xot. Chiekal naexasich wɔt Cristo pejwuajan, nejchachaemlas wɔtbej Dios nakbɔ'weyaxaelpoxliajwa, jatis wɔt, pomatkoicha Dios pejiwaxaes.

**Dios tapaeyaxaelpox pejjiw leliajwa japonxotse**

**7-8** Kaes pejme pachaem Jesucristo. Me-ama Moisés, ángelesbej, jachi-el Jesucristo. Samata, ¡Jesús chiekal naexasisfɔlde! Dios pejjamechan chajia lelsxot jɔm-aech, Espíritu Santo jɔm-aechpox:

- “Amwütjel, xamal jüm-taenam wüt Dios jüm-aechpox, ñabej naexasisle! Dios naexasisliajwam! Me-ama a sew nejwüajnapijiw xot, naexasis-eli Dios, ñxamal nabej ja-aече! Chajiakolaxtat pajilaxtat japi duilafül wüt, japi nejwesla isfulaliajwa Dios tato'laspoxan. Japi naexasisfula-el Dios. Pe nakiowa, japi toes-esal Dios.
- 9** Nejwüajnapijiw naexasis-el, Dios pajilaxtat wüti. Naexasis-elbejpi, Dios to'as wüt. Cuarenta waechan Dios is koechaxan nejwüajnapijiwliajwa. Japoxan taen wüt, nakiowa naexasisfula-eli, Dios tato'las wüt.
- 10** Samata, Dios palala nejwüajnapijiwliajwa. Dios jüm-aech: ‘Japi naexasisfula-el, xan tato'lax wüt. Nejwesla isliajwa xan tato'laxpoxan’ —aech Dios nejwüajnapijiwliajwa.
- 11** Samata, Dios palala wüt, jüm-aechon: ‘Japi pasaxil xan chaemtaxxotse damlathulaliajwa’ —aech Dios nejwüajnapijiwliajwa” —aech japox Espíritu Santo.
- 12** Takoew, ñajut chiekal natataefülde! Nejchaxoelam wüt Diosliajwa, ñabej nejchaxoele!: “Xan kofsaxaelen Dios naexasitxpx, Dios chiekal ajil xot” —nabej aeche!, nejchaxoelam wüt! Diachwüajnakolax Diosjila-el. Japon duk. **13** Xamal ampathatat laelpam wütfük, ñpomatkoicha nakaewa nanaewüajande Dios pejjamechan Dios kaes xanaboejalijwam! ¡Ja-amde, kaen xamalxot Satanás naekichachajbasamatas babijax isasamatapon! ¡Ja-amde kaen xamalxot naexasislasamata Dios, a sew jiw xamal naewüajan wüt! **14** Xatis chiekal naexasisaxaes Jesús pejwüajan. Me-ama akasestat chiekal naexasisfulas wüt, jachisfulaxaes. Laelpas wüt ampathatat, kofaxisal naexasichpox Jesús pejwüajan. Jatis wüt, xatis duilaxaes Cristo tato'alxotse.
- 15** Dios pejjamechan, chajia lelspx, jüm-aech wüt, jüm-aechox xamal naexasislasamatam:
- “Amwütjel, xamal naewetam wüt Dios jüm-aechpox, ñabej naexasisle! chiekal naexasisliajwam! Me-ama nejwüajnapijiw pajilaxtat naexasis-el, ñxamallax nabej ja-aече!” —aech Dios pejjamechan, chajia lelspx.
- 16** Xamal chiekal matabijam, Moisés bñfol wüt, israelitas nakola wüt Egipto tñajñuxotdin. Japibej Dios naexasis-el, jüm-taen wüti, Dios pajut chiekal jüm-aech wüt. **17** Xamal chiekal matabijambej, israelitas babijaxan is wüt Diosliajwa, cuarenta waechan pajilaxtat wüti, Dios palala. Samata, japi tñp pajilaxtat.

**18** Japi naexasis-el wut Dios jumtispor, japi leyaxil Dios chaemt-xotse jiw damlathulaliajwa. **19** Xatis matabijas, wajwujnapijiw le-el damlathulaxxotse, naexasis-el xoti Dios jum-aechpor.

**4** Xatis Dios nakwujnawesful damlathulaxxotse, me-ama Dios nakjumdut. Samata, chiekal naexasisfulaxaes Jesús pejwujajan. Nakaewa nakajachawaesfulaxaes chiekal naexasisfulaliajwas Jesús pejwujajan, asamatkoi kaeyaxtat damlathulaliajwas damlathulaxxotse. **2** Xatisbej jumtaens chimiawujajan damlathulaliajwas, me-ama wajwujnapijiw majt jumtaen. Wajwujnapijiwliajwa japawujajan chiekal wepachaema-esal, naexasis-el xoti. **3** Pe naexasichpis Jesús pejwujajan, damlathulaxaes Dios nakjumdutxotse. Jesús pejwujajan naexasis-eli jaxotse damlathulaxil. Dios japox jum-aech, palala wut:

“Japi leyaxil xan chaemtaxxotse damlathulaliajwa” —aech Dios.

Dios toet wut that isax, thatbaxobej, jawut toetbejpon isax wajwujnapijiw damlathulaxaelxotse. **4** Dios pejjamechan, chajia lelspor, jum-aech wut, jum-aechbejpor Dios ispor, séptimomat-koi wut:

“Séptimomat-koi wut, kaes Dios is-el. Jawut damlathulon” —aechox.

**5** Dios pejjamechan, chajia lelspor, jum-aech wut, jum-aechbejpor Dios jum-aechpor asew jiw naexasisaxilpor Jesús pejwujajan:

“Japi jiw leyaxil damlathulaliajwa xan chaemtaxxotse” —aech Dios jum-aechpor.

**6** Matxoelajumtaenpi chimiawujajan naexasis-el xoti, japi leyaxil damlathulaxxotse. Samata, xabich jiw we'pfuk leliajwa jaxotse. **7** Asew jiw naexasis-el xot chimiawujajan, Dios jumdut asamatkoi asew jiw leyaxaelpor damlathulaxxotse. Chajia Dios to'a rey David jumchiliajwa ampamatkoiyan asew jiw leyaxaelpor damlathulaxxotse. Rey David jum-aech japoxliajwa:

“Xamal jumtaenam wut Dios jum-aechpor, jnabej naexasisle' Dios naexasisliawam!” —aech rey David.

**8** Josué bu'pat wut israelitas Canaán tuajnu'xot, japatuajnu Dios xapae-el pomatkoicha israelitas damlathulaliajwa. Japatuajnu Dios xapaei wut pomatkoicha israelitas damlathulaliajwa, ja-aech wut, Dios jumtusaxil asamatkoi pejjiw israelitas

damlathulaxxotse leliajwa. **9** Samata, matabijas, asamatkoi Dios tapaeyaxael pejiw leliajwa damlathulaxxotse. Jatis wuti, Dios pejiw damlathulaxael jaxotse. Me-ama Dios damlathul séptimomatkoi wut, jachiyaxaelbej Dios pejiwpi. **10** Japi leyaxael damlathulaxxotse damlathulaliajwa. Me-ama Dios damlathul, isax toet wut, jachiyaxaelbej japi jiw. **11** ¡Ma xamal ixajupamdo' puexa isliajwam, do japoxtat isde lelaliajwam damlathulaxxotse! Chajiakolaxtat wajwujnapijiw Dios naexasis-el japi leliajwa damlathulaxxotse. Samata, puexa xatis, me-ama japi, jachiyaxisal.

**12** Dios pejjamechan xabich mamnik. Me-ama espada, nataelapabua'powa, xua'la wut xabich funiachde, ja-aechbej Dios pejjamechan. Dios pejjamechan xajup leliajwa xabich funiach jiw pejmatpñatan poxade, japi pajut chiekal matabijaliajwa, ma-aech pejnechaxoelaxan, pachaem wut, o, chaemil wut. **13** Puexa Dios ispoxan, japoxan namoechaxil Dios pejwujnalel, Dios puexa chiekal taen xot japoxan. Asamatkoi xatis kaenanula Dios chapaeyaxaes, ma-aech xot isas kaenanula isaspoxan.

### **Amxot jum-aechpox Jesús sacerdotekolanpon, Dios kawujnaliajwapon puexa jiwliajwa**

**14** Jesús, Dios paxulan, athu poxasepon wajsacerdotekolnaliajwa. Japon Dios kawujnaful xatisliajwa, Dios xatis nakkajachawaesliajwa. Samata, ¡Dios chiekal naexasisaxaes! **15** Jesús ampathatat wut, Satanás xapaejaspon babijax isliajwa. Pe nakiowa, Jesús is-el babijax. Samata, Jesús chiekal matabijt, ma-aech Satanás nakxapaeja wut babijax isliajwas. **16** Samata, Satanás nakxapaeja wut, xatis kamta Dios kawujnaxaes nakkajachawaesliajwa. Jatis wut, Dios nakkajachawaesaxael, nakbeltaen xoton, naknejxasink xotbejpon.

**5** Puexa sacerdotexot, kaen sacerdote makafich Dios, japon puexa sacerdotespaklokolnaliajwa. Do jawux, japon puexa sacerdotespaklokolnaxael, Dios kawujnafulaliajwa puexa jiwliajwa. Choef xua'atbejpon Dios beltaeliajwa puexa jiw babijaxan ispoxanliajwa. **2** Ampathatat tampoela-el sacerdotexot isliajwa babijaxan, Satanás xapaejas wut, asbuan jumch jiwkal xoti. Samata, puexa sacerdotespaklokolan xajup jiw beltaeliajwa, jiw is wut babijaxan matabijs-elaxtat. **3** Puexa sacerdotespaklokolan, choef xua'asliajwa wut, kaen choefan matxoela xua'lapon,



pajut babijaxan ispoxanliajwa Dios beltaeliajwas. Japox kitoet wut, sacerdotespaklokolan pejme asew choef xua'aton asew jiw babijaxan ispoxanliajwa japibej Dios beltaeliajwas. **4** Sacerdotes pajut namakafisaxil puexa sacerdotespaklonkolnaliajwa. Sacerdote Dios makafich wut, ja-aech wutlax, japon puexa sacerdotespaklokolnaxael. Me-ama chajiakolaxtat wajwuaajnapijin Aarón Dios makafich sacerdotespaklokolnaliajwa, jachiyaxael japon sacerdote. **5** Cristoliajwa japox ja-aechbej. Japon pajut namakafis-el sacerdotekolnaliajwa. Dios makafichpon. Dios jumtisbejpon:

“Xam taxulnam. ¡Puexa jiw nej matabijs diachwuaajnakolax xam taxulnamponam!” —tison Dios.

**6** Dios pejjamechan, chajia lelspx, jum-aech wut, jum-aechbejpx Dios jum-aechpx Cristoliajwa:

“Xam pomatkoicha sacerdotnaxaelam. Me-ama Melquisedec pomatkoicha sacerdote, xamlap-is jachiyaxaelam” —aech Dios jum-aechpx Cristoliajwa.

**7** Jesucristo ampathatat wut, pin-iaveces pinjametat Dios kawuajanpon. Dios kawuajan wut, xabich nejxaejwas wut, itminpon. Jasoxtat Jesucristo Dios kawuajan Dios bu'weliajwas, matabijt wut padaelmajiw boesaxaespx. Pe jawut, Jesucristo nakiowa nejchaxoel: “Xan isaxaelen taj-ax Dios nejxasinkpx” —aechon, nejchaxoel wut. Samata, Dios kajachawaechpon isliajwa Dios nejxasinkpx. **8** Jesucristo, Dios paxulan, xabich pachaempon. Japon nejchaxoel: “Xan nabijasaxaelen. Pe nakiowa, Dios chiekal naexasisaxaelen” —aechon, nejchaxoel wut. Samata, naexasitpon pax Dios. **9** Cristo chiekal naexasit xot pax Dios, japon tup puexa jiw bu'wuaajanjilialiajwa Diosliajwa. Samata, puexa jiw, naexasiti Jesús pejwuaajan, japon bu'weyaxael japi jiw pomatkoicha duilialiajwapi Diosxotse. **10** Samata, Dios makafit Jesús sacerdotekolnaliajwa, me-ama Melquisedec pomatkoicha sacerdote, jachiliajwa Jesús.

### **Jesús pejwuaajan naexasiti naewuajnaspx kofasamata naexasitpoxliajwa**

**11** Xan xabich lelaliajwan Jesucristoliajwa, sacerdotekolanpoxliajwa. Pe pachaema-el puexa chiekal chanaekabuaneliajwan, xamal makach matabija-emil xot. **12** Xamal piach Jesús pejwuaajan naexasitam. Pelis, ama xamal jiw chanaekabuaniwaxaelam.

Pe nakiowa, xamal xabich we'pamfuk asew jiw chiekal chanaekabuanaliajwam Dios jum-aechpoxan, matabija-emil xot kaes tampoelpoxan chiekal jummatajibaliajwam. Samata, xamal, me-ama yamxi naxaeyaxan xaeyaxilpi, ja-am xamal. Me-ama yamxi mitan afpi, ja-ambej xamal. **13** Jiw wewe'paspi naewwajnalijwas tampapoxan, Dios pejjamechan, japi pejnechaxoelaxan, me-ama yamxi, mitan afpi, ja-aechi. Japi matabija-el isliajwa Dios nejaxsinkpoxan. **14** Jiw chiekal matabijapi Dios pejjamechan, japi matabija isliajwa pachaempoxan. Matabijabejpi is-elaliajwa pachaema-elpoxan. Samata, japi jiw Diosliajwa, me-ama pakdiachow xaeyaxaelpi naxaeyaxan, ja-aech japi jiw.

**6** Samata, Dios pejjamechan kaes matabijaxaes chiekal naexasisliajwas Dios. Jatis wut, diachwujnakolax Diosliajwa, xatis, me-ama pakdiachwas wut, jachiyaxaes. Jatis wutbej, asew jiw nakwewe'paxil kaeyax naknaewwajnalijwa majt naknaewwajanpoxan, akasestat tuduws wut naexasisliajwas Jesús pejwujan. Jatis wut, japoxanliajwa pomatkoicha naknaewwajnael. Asaxan nakwewe'paxil kaes naknaewwajnalijwa, chiekal matabijas xotlis japoxan. Samata, nakwewe'paxilbej nakfiasliajwa babijaxan is-elaliajwas Dios nakkastika-elaliajwa. Nakwewe'paxilbej naktato'laliajwa Dios chiekal naexasisliajwas. **2** Nakwewe'paxilbej kaes naknaewwajnalijwa bautisapoxliajwa. Nakwewe'paxilbej kaes naknaewwajnalijwa ancianos ki-owapoxliajwa naexasiti Jesús pejwujan, japi pejta'antat, Dios kawwajnalijwa wut. Nakwewe'paxilbej kaes naknaewwajnalijwa tupi matyaxaesproxliajwa pejme duilaliajwa. Nakwewe'paxilbej kaes naknaewwajnalijwa pejbu'wujanpi pomatkoicha kastikaxaesproxliajwa. **3** Dios naktapaei wut, jkaes chiekal naexaxisaxaes Jesús pejwujan!

**4** Asew jiw matabija diachwujnakolaxpox. Samata, naexasiti Jesús pejwujan Dios bu'welialjwas. Japi jiw pejmatpuatanxotbej Espiritu Santo. **5** Japi matabijabej Dios pejjamechan xabich pachaempox. Matabijabejpi Jesús asamatkoi ampathatat tato'laxaelpox. **6** Pe kofa wuti naexasitpox Jesús pejwujan, diachwujnakolax japi jiw chiekal napelsaxael Diosliajwa. Ja-aech wut, japi jiw pijaxtat puexa asew jiw bu'wujanpaeyaxaeli Jesúsliajwa. Kofapi Jesús pejwujan naexasitpox, japi jiwlap,

me-ama cruztat pejme kimatamatali Jesús, jachiyaxaeli. **7**Dios pijaxtat iam thilan ampathatat. Samata, muthaspi chiekal nakweti't. **8**Iam thilan wut, toeixkal naboela wut, pachaemael. Toeixkal wut, asamatkoi toejafaxaes. Jachiyaxaes jiw, Jesús pejwujajan naexasitpox kofapi. Asamatkoi Dios kastikaxaes infernoxotdik.

### **Xatis chiekal naexasisaxaes pox Jesús pejwujajan, Dios nakkajachawaet xot**

**9**Takoew, xamal nejxasinkaxpim, xan chiekal matabijtax, asew jiw kofa naexasitpox Jesús pejwujajan. Xamal kofa-emil. Xan matabijtaxbej chiekal duilampox. Chiekal naexasitam xot Jesús pejwujajan, Dios xamal bu'wia. **10**Dios is pachaempoxan. Japon nejkiowaxil xamal isampoxan japonlijawa. Nejkiowaxil-bejpon asew jiw, naexasiti Jesús pejwujajan, kajachawaetampox, japi jiw xamal nejxasinkam xot. ¡Xamal amwutjelbej japi jiw nakiowa kajachawaesfulde! **11**Xan nejxasinkax xamal kaenanula nakaewa nakajachawaeslijawam pomatkoicha. Jam wut, Dios xamal kaenanula chaxduiyaxael pachaempox. Diachwujajnakolax xamal chaxduiyaxaelon wujajawetampox. **12**¡Xamal nabej nejwesle' naexasislijawam Dios! ¡Pomatkoicha naexasisfulde Dios! Me-ama asew jiw pomatkoicha chiekal naexasisfuli Dios, ¡xamalbej ja-amsfulde! Japi jiw kofa-el naexasitpox Dios. ¡Japoxlap xamal jachisfulaxaelambej! Dios chajia jum-aechpox xabich pachaem. Japi jiw chaxduiyaxaes pachaempox, Dios chajia jum-aechpox chaxduilijawa.

**13**Chajiakolaxtat Dios jum-aech Abrahamlijawa chiekal naexasislijawa: “Xan Diosnan xot, tajut jum-anpox xamlijawa, diachwujajnakolax” —aech Dios Abrahamlijawa, japon chiekal matabijslijawa. Dios japox jum-aech, kaes pachaempon ajil xot, me-ama Dios. **14**Dios chajia jum-aech wut, jum-aechon Abrahamlijawa: “Diachwujajnakolax xam kajachawaesaxaelen. Samata, namojiw xabichaxael” —aech Dios Abrahamlijawa. **15**Do jawux, Abraham wujajawesful piach Dios jumduchpox. Baxael, japox ja-aechlisox Abrahamlijawa. **16**Jiw jumduw wut asew jiwlijawa, jum-aechi ampox: “Xamal jumduxpox, Dios chiekal japox najumtaen” —aechi asew jiwlijawa, chiekal naexasislijawas jumduw pox. Kaes pejme asax jumchiyaxili asew jiw chiekal naexasislijawas. **17**Dios jumdut wut jiwlijawa,

nejxasinkon jiw chiekal naexasisliajwas japon j̄um-aechpox. Samata, j̄umdut w̄ut, j̄um-aechbejpon: “Xan Diosnan xot, j̄umduxpox diachw̄ajnakolax japox xamalliajwa” —aech Dios, jiw chiekal pajut matabijaliajwa japon j̄um-aechpox diachw̄ajnakolax. **18** Dios kichachajba-el. Samata, puexa japon j̄um-aechpox diachw̄ajnakolax. Dios nakj̄um-aech nakb̄'weyaxaelpox. Samata, xatis nejchaxoels w̄ut, nejchaxoelaxisal: “Xatis Dios nakb̄'weyaxil” —chiyaxisal, nejchaxoels w̄ut. Diachw̄ajnakolax Dios nakb̄'weyaxael. **19-20** Jesús t̄ap w̄ut, jaw̄ut Dios poxasepon. Jaxotse Jesús Dios kaw̄ajnaf̄ul puexa xatisliajwa. Jesús sacerdotekolan. Me-ama Melquisedec pomatkoicha sacerdote, ja-aechbej amw̄utjel Jesús Diosxotse. Samata, xatis chiekal Jesús xanaboejas. Asamatkoi japon xatis nakb̄'flayaxael duilaliajwas Diosxotse.

### Amxot j̄um-aechpox Jesús sacerdotekolanpox, me-ama Melquisedec, ja-aechpon

**7** Melquisedec chajiakolaxtat duk w̄ut Salem paklowaxxot, japon rey japapaklowaxpijiwliajwa. Pe japonbej sacerdote, Dios, ath̄uxotsepon, pejsacerdote. Japamatkoiyan Abraham, pamak s̄apich, malechapi asapaklowaxanpijiw, reyes. Puexa chiekal bapon. Jaw̄ut Abraham, pamak s̄apich, noti padaelmajiw pejew. Abraham, pamak s̄apich, nawen w̄ut, Melquisedec xab̄'kult nuamfatat. Do jaw̄ut, Melquisedec Dios kaw̄ajan Abraham kajachawaesfulaliajwas Dios. **2** Do jaw̄ut, Abraham tameja kaeyaxtat padaelmajiw pejew. Jaw̄utbej Abraham diajk diezmuaxt, naj̄upamuaxtje. Jaw̄ut kaemuaxt malech chaxduton Melquisedec. Abraham chaxdutupox Melquisedec, japox paw̄ul diezmo. Diajkpoxan wenamanson, nuevem̄uaxt, Abraham pamakliajwa. “Melquisedec” —aech w̄ut hebreojametat, japox j̄umchiliajwa: “Rey, xabich pachaempon” —chiliajwa Melquisedec pejw̄ul. Japaw̄ulbej j̄umchiliajwa: “Rey, w̄ajan chaemsan jiw chiekal duilaliajwa” —chiliajwa Melquisedec pejw̄ul. Japonbej rey Salem paklowaxpijiwliajwa. **3** Dios pejjamechan, chajia lelspos, j̄umchi-el Melquisedec paxliajwa, japon penliajwabej, pejw̄ajnapijiwliajwabej. Dios pejjamechan j̄umchi-elbej Melquisedec nalaelt̄poxliajwa, t̄appoxliajwabej. Samata, Melquisedec, pomatkoicha sacerdotepon. Me-ama Dios pax̄ulan pomatkoicha sacerdote, ja-aechbej Melquisedec.

4 ¡Nejchaxoelde chiekal! Melquisedec kaes pejme pachaem. Japon pachaempox, me-ama Abraham, jachi-el. Samata, Abraham chaxdut diezmo Melquisedec itpaeliajwa sitaeyax. 5 Moisés chajia lelpox to'a sacerdotes, japi Leví pamojiwpi, mat-omwuljoeliajwa nakae-israelitas. Samata, israelitas chaxduiful kaesupich kanapi, muthapibej. Japox pawul diezmo. Jasox to'as sacerdotes mat-omwuljoeliajwapi nakae-israelitas, Abraham pamojiw. 6 Melquisedec Leví pamona-el. Kaes pejme xabich pachaempon. Japon, me-ama Abraham, jachi-elbejpon. Samata, Abraham diezmo chaxdut Melquisedec itpaeliajwa sitaeyax. Do jawut, Melquisedec Dios kawuajan Abrahamliajwa Abraham Dios kajachawaesfulaliajwas. 7 Xatis chiekal matabijas, Dios kawuajanpon asew jiwliajwa japi Dios kajachawaesliajwas, japon kaes pachaem. Me-ama Dios kajachawaesaxaespí, jachielon. 8 Sacerdotes kinot, jiw chaxduws wut diezmo. Japi sacerdotes tupaful, jiwkal xot. Pe Dios pejjamechan jum-aech wut Melquisedeciajwa, ja-aech wut, me-ama Melquisedec nakiowa laeja wut, ja-aechon. 9-10 Chajiakolaxtat, Abraham malech chaxdut wut diezmo Melquisedec, japamatkoi Leví chiekal jilfuk, nalaels-el xoton. Abraham xijilfuk-is. Pamojiw-bej jil. Pe baxael, Leví pamojiw, japi lap amwutjel sacerdotes nadofaful. Dolis Abraham chaxdut wut diezmo Melquisedec, jawutbej puexa Leví pamojiw, me-ama chaxduti japadiezmo Melquisedec.

11 Ampamatkoiyantat Leví pamojiw, sacerdotes. Japi naewuajnaful judíos naexasisliajwa Moisés chajia lelpox. Me-ama chajiakolaxtat sacerdote Aarón naewuajan, ja-aechbej japi jiw amwutjel. Pe judíos chiekal naexasis-el Moisés chajia lelpox, japi bu'wuajanjilaliajwa Diosliajwa. Samata, japi wewe'pas asan sacerdote, me-ama Aarón, jasona-el. Japi wewe'pas asan sacerdote, japon pomatkoichaxaelpon, me-ama Melquisedec, jason. 12 Samata, Jesús makafich wut sacerdotekolnaliajwa, jawut judíos kaes wewe'pa-esal Leví pamojiw, japi sacerdotnaliajwa. 13 Dios pejjamechan chajia lelsxot jum-aech wajpaklon Jesúsliajwa. Jesús Leví pamona-el. Japon asamutpijin. Majt chiekal ajil sacerdote japamutpijiwxot. 14 Puexa jiw chiekal matabija, wajpaklon nalaelt wut ampathatat, japon nalaelt Judá pamowtat. Moisés chajia lelpox jumchi-el Judá pamojiwxot sacerdotnaliajwa.

**15** Samata, xatis chiekal matabijas, wajpaklon nalaelt sacerdotnaliajwa. Japon, me-ama asew sacerdotes wut, jachi-elon. Japonlap pomatkoicha sacerdotnaxael. Me-ama Melquisedec pomatkoicha sacerdote, japonbej jachiyaxael. **16** Leví pamojiw sacerdotes nadofa, to'as xoti Moisés chajia lelpox. Baxael, wajpaklon Jesús sacerdote wut, japon to'a-esal Moisés chajia lelpox sacerdote nadofaliajwa. Japonlax pomatkoicha dukaxael. Samata, japon sacerdotekolan nadofa. **17** Dios jum-aech Jesús jumtaeliajwa:

“Xam pomatkoicha sacerdotnaxaelam. Me-ama majt chajiakolaxtat Melquisedec pomatkoicha sacerdote, xamlap, jachiyaxaelam” —aech Dios Jesúsliajwa.

**18-19** Judíos chiekal naexasis-el Moisés chajia lelpox, bu'wujanjilialiajwapi Dios pejwujnalel. Samata, Moisés chajia lelpox, amwutjel japox jiw wewe'pa-esal naexasisliajwa. Amwutjel asawujajan xatis naexasisliajwas. Japawujajan kaes pejme pachaem. Jesucristo tup xatis bu'wujanjilialiajwas Diosliajwa. Samata, japon pijaxtat, Diosliajwa xatis bu'wujanjisal. Xatis Jesucristo xanaboejaxaesbej Diosxotaliajwas.

**20** Dios pajut jumdut Jesucristo pomatkoicha sacerdotnaxaelpox. Dios majt japox jumtus-el asew sacerdotesliajwa. **21** Japox Dios pejjamechan, chajia lelpox, jum-aech wut, jum-aechox Dios jum-aechox Jesúsliajwa:

“Xan Diosnan xot, diachwujanakolax chiekal jum-an. Asax nejchaxoelaxinil. Xam sacerdotnaxaelam pomatkoichaliajwa” —aech Dios, jumdut wut Jesúsliajwa.

**22** Dios jasox jum-aech xot Jesúsliajwa, chiekal matabijas, Jesús ispox xatisliajwa kaes xabich pachaem. Samata, me-ama Moisés chajia lelpox, jachi-el Jesús ispox xatisliajwa. **23** Chajiakolaxtat sacerdote tup wut, asan makafich japon sacerdotnaliajwa. Japox ja-aechful judíosxot. Samata, xabich sacerdotes. **24** Pelax Jesús tupaxil. Samata, japon pomatkoicha sacerdotekolnaxael. Jesús sacerdote wut, asan naliaksaxil japon aton sacerdotekolnaliajwa. **25** Samata, Jesús xajup pomatkoicha jiw bu'welialjwa, pasliajwapi Diosxotse. Jesús duk Diosxotse. Japon pomatkoicha Dios kawujajan japon pejwujajan naexasitiliajwa.

**26** Jesús, sacerdotekolan, kaes pejme pachaempon. Jasonlap majt xatis nakwewe'p. Japon pomatkoicha is pachaempoxan.

Babijax is-elon. Dios bufloeisbejpon athu poxase. **27** Jesús, me-ama puexa sacerdotespaklokolan, jachi-el. Japi choef xua'at ofrenda isliajwa Diosliajwa. Japox isliajwa wut, majt kaen choefan xua'la pajut pejbu'wuaajanpoxliajwa. Do jawux, asew choef xua'at asew jiw pejbu'wuaajanpoxanliajwa. Jesús jasox is-el. Japon pajut natapaei asajiw kimatamatlaliajwas cruztat. Jasoxtat japon boesas wut, japon pajut, me-ama ofrenda Diosliajwa. Jesús boesas wut asajiw, kamta moton puexa jiw babijaxan ispoxanliajwa. Japox pomatkoichaliajwa. **28** Moisés chajia lelpox jum-aech kaen makafisliajwa puexa sacerdotespaklokolnaliajwa. Pe nakiowa, japon xajupa-el isliajwa puexa Dios nejxasinkpoxan. Do baxael, pejme Dios jumdut paxulan sacerdotekolnaliajwa. Japon xabich pachaem pomatkoichaliajwa. Japonlax xajup puexa isliajwa, Dios nejxasinkpoxan.

### **Amxot jum-aechpox Jesucristo, wajsacerdotekolanpon, japon pomatkoicha Dios kawuajan xatisliajwa**

**8** Jesús, wajsacerdotekolan, japon Dios kawuajan xatisliajwa. Amwutjel japon ek Dios poklalel. Japox kaes pejme pachaem xamal chiekal matabijaliajwam. **2** Jesús nabist Diosxotse tabernáculobatata sacerdotebichax. Dios pajut japaba is. Japaba jiw is-el.

**3** Puexa sacerdotespaklokolan makafich choef xua'asliajwa, ofrenda isliajwa Diosliajwa. Jesucristo wajsacerdotekolnaliajwa wut, pajut natapaeipon asajiw boesaliajwas. Ja-aech wut, Jesucristo pajut, me-ama ofrenda wut, ja-aechon Diosliajwa. **4** Sacerdotes ampathatat choef xua't ofrenda isliajwa Diosliajwa, me-ama Moisés chajia lelpox jum-aech. Jesús amwutjel ampathatata-elon. Amwutjel Jesús Diosxotse. Jesús ampamatkoitat ampathatataxael wut, ja-aech wut, choef xua'asaxilon. Me-ama asew sacerdotes choef xua't wut, jachiyaxilon. **5** Sacerdotes nabistpox ampathatat, japox, me-ama Jesucristo nabistpox Diosxotse, ja-aechox. Moisés Dios pejtabernáculoba isliajwa wut, Dios jum-aech: “¡Nabey nejkiowe' puexa itpaeixpoxan pinamuxxot! Tajtabernáculoba isam wut, jisde, me-ama xan chajia chiekal xam chanaekabuanax!” —aech Dios Moisés-liajwa. **6** Pe Jesucristo, wajsacerdotekolanpon, japon nabist Dios to'aspox Diosxotse xatisliajwa. Japox kaes pejme pachaem. Me-ama sacerdotes ispox ampathatat jiwliajwa, jachi-el japon


nabistpox. Jesucristo pomatkoicha Dios kawuajan xatisliajwa. Japon tɔp wɔt, xatis babijaxan isaspoxan chiekal nakwetoep Diosliajwa. Nakkajachawaetbejpon Dios nakchaxduiliajwa chajia nakjɔmdutpox duilaliajwas pomatkoicha Diosxotse. Japoxanlap xatisliajwa xabich kaes pejme pachaem. Me-ama Moisés chajia lelpox, jachi-el.

**7** Moisés chajia lelpox chiekal pachaemaxael wɔt, japox jiw chiekal naexasit wɔtbej pachaemaliajwapi Diosliajwa, ja-aech wɔt, jiw wewe'paxisal asawuajan naexasisliajwa chiekal pachae-maliajwapi Diosliajwa. **8** Pe nakiowa, jiw chiekal naexasis-el puexa Moisés chajia lelpox. Samata, Dios jɔm-aech:

“Asamatkoi xan to'axaelen pajelwuajan naexasisliajwa Israel tɔajɔpijiw, Judá tɔajɔpijiwbej, pomatkoicha duilaliajwapi xanxotse.

**9** Pajelwuajan najɔpaxil majt jɔm-ampox pejwuajnapijiwliajwa. Japi Egipto tɔajɔpɔxot wɔt, xan japi jukx. Japibej xan nanaexasis-el, chajia jɔm-an wɔt. Samata, japi jiw koftax” —aech Dios.

**10** Dios kaes jɔm-aech: “Xan jɔm-an ampox Israel tɔajɔpijiwliajwa pajelwuajanliajwa. Asamatkoi tajjamechan kaenanɔla jiw matabijaxael. Samata, nejxasinkaxael naexasisliajwa tajjamechan. Xan japi pejDiosnaxaelen. Japibej tajjiwaxael.



©DCC

(Hebreos 8.1–12)



- 11** Japamatkoijan puexa paklochow, paklochowa-elpipej, xan chiekal namatabijaxael. Samata, chinax kaen aton jumchiyaxil xanliajwa asew jiwxot.
- 12** Xan japi jiw beltaeyaxaelen. Kaes nejchaxoelaxinil japi majt babijaxan ispoxan. Nejkiowaxaelen japoxan” —aech Dios.
- 13** Dios jum-aech pajelwuañanliajwa, matxoelapejwuañan chiekal pachaema-el xot. Matxoelapejwuañan kaematkoijan srapich we’p toepaliajwa.

**Amxot jum-aechpox Dios pejtabernáculobaliajwa,  
asatabernáculobaliajwabej, Diosxotsepox**

**9** Moisés chajia lelpox tato'las israelitas isaxaelpoxan, tabernáculobatat Dios kawuañan wuti. **2** Dios pejtabernáculoba, ampathatpijax, japox kolepiezax. Matxoelapiezax pawul Lugar Santo. Jaxot chanuk candelabro itliakaliajwa japapiezaxxot. Jaxotbej kaemesa nuk. Japamesamatwuañtat pomatkoicha sacerdotes pan owa Diosliajwa. **3** Jaxot asapiezaxliajwa duch pinabu'. Japapiezax pawul Lugar Santísimo. **4** Japapiezaxtat altar nuk, oro matxafafaspo, japa-altarmatwuañtat bowaliajwa xabejasapan, pawulpi incienso. Jaxotbej baúl ek, oro matxafafaspo patulel, fuletlelanbej. Japabaúltutat ek baext, orotat isaspot. Japabaextutat cha-ek maná. Aarón pejkilachalanaeya-bej japabaúltutat ok. Japox kilachalanaeya chajia uafnakola. Japabaúltutat oelbej kole-ia't, papa'a. Japa-ia' lels diez tato'laxan, Dios tato'alpoxan jiw naexaxisliajwa. **5** Japabaúlfafamatwuañtat kolenje, ángeles-ael isaspi, nows. Ba'dolanuili. Japa-ángeles-aelanliajwa israelitas wultaen wut, japi pajut chiekal matabijaliajwa Dios japatabernáculobatatpox. Pe amwutjel, kaes lelaxinil japoxan chanaekabuanaliajwan.



©DCC

**6** Ja-aech majt Dios pejtabernáculoba. Sacerdotes

(Hebreos 9.1–6)

pomatkoicha low matxoelapiezaxxot isliajwa pejbichaxan. 7Pe asapiezaxxot, Lugar Santísimoxot, tapaeis puexa sacerdotespaklokolkankal tamach leliajwa. Japon low japapiezaxxot, kaewaechful wut. Low wut, chaxlowpon choefjal matsasalsliajwa baúlmatwuj. Jasox ispon Dios beltaeliajwas pajut babijaxan ispoxanliajwa. Jawux pejme jasox ispon puexa asew jiw babijaxan ispoxanliajwa, japi pajut chiekal matabija-el xot, is wut babijaxan. 8 Israelitas chiekal matabija kaen, puexa sacerdotespaklokolan, leyaxaelpox Lugar Santísimoxot. Samata, Espíritu Santo nakkajachawaet matabijaliajwas xatis jaxot wajut leyaxisalpox Dios kawujnaliajwas, xatis babijaxan isaspoxan nakbeltaeliajwapon. Puexa sacerdotespaklokolan, japon kaen, Dios kawujnaxael xatisliajwa. 9 Puexa sacerdotis ispoxan, japoxan ampamatkoiyan xatisbej chiekal matabijaliajwas. Sacerdotes choef xua'at wut ofrenda isliajwa Diosliajwa, puexa jiw babijaxan ispoxanliajwa Dios beltaeliajwas, japoxan is wuti, nakiowa kajachawaes-esal kaes chiekal pachaemaliajwapi Diosliajwa. 10 Moisés chajia lelpox israelitas naexasit wut, pe japi nakiowa, chiekal pachaema-el Diosliajwa. Japawujantat japi tato'las pajut chiekal natataeflaliajwa, naxaeyaxan xaeliajwa wut, feliajwa wutbej. Japibej naexasit wut japox, pin-iaveces kikakiati chiekal pachaemaliajwa Diosliajwa. Jasox majt chajia israelitas isful, Jesucristo pas-el wutfuk ampathatat. Jesucristo pat wut, Moisés chajia lelpox toep, pajelwujjan tuadut wut.

11 Cristo pask wut ampathat, japon wajsacerdotekolan nadofa. Samata, puexa chiekal pachaem xatisliajwa japon pijaxtat. Pe pejme kaxasepon pax Dios poxase. Cristo nabist Dios pejtubernáculobaxotse. Jaxotse kaes pejme pachaem. Me-ama ampathatat jiw isba, Dios pejtubernáculoba, jachi-el japaba. 12 Cristo low wut Dios pejtubernáculobaxotse, Lugar Santísimoxot, chaxle-el chivojal, pakjalbej, mosliajwa xatis babijaxan isaspoxanliajwa. Pelax japon tuj wut, me-ama pejjal xalow wut, ja-aechon. Tuj wut, moton xatis babijaxan isaspoxanliajwa nakbu'weliajwa pomatkoichaliajwa. 13 Israelitas babijaxan is wut, tapae-esal Dios pejtubernáculoba leliajwa. Ja-aech wut, israelitas majt matsasaltas torjal, o, chivojal. Pakxulan, altarmatwujtat bochpon, japathumba min tanialtas, jalmint suapich. Do jawut, israelitas matsasaltas japajalmint. Ja-aech wut, pachaem israelitas pejme leliajwa Dios pejtubernáculoba. 14 Cristo pejjal xabich kaes pejme

ommaenk Diosliajwa. Me-ama choefjal, jachi-el. Cristo kajachawaech Espíritu Santo, japon pomatkoichapon. Samata, Cristo pajut natapaei asajiw boesaliajwas xatis babijaxan isaspoxan nakwemosliajwa. Me-ama choefan xua'las wut ofrenda isliajwa Diosliajwa, jakitis Cristo. Samata, Cristo tɔp xot cruztat, Dios nakbeltaen xatis babijaxan isaspoxanliajwa. Babijaxan isas xot, xatis wajut chiekal napeltaslach Diosliajwa. Pe Cristo, babijax is-elpon, nakwemot xot, xatis xajɔps Dios tanbichliajwas, japon Diosxotse dukpon.

**15** Samata, Jesucristo tɔp xot cruztat, Dios nakkajachawaet. Puexa xatis Dios nakmakanot pomatkoicha duilaliajwas Diosxotse, me-ama Dios chajia jɔmdut. Cristo tɔp xatis babijaxan isaspoxanliajwa bu'wɔajanjilaliajwas Diosliajwa. Samata, Dios nakbeltaen. **16-17** Aton laeja wɔtfɔk, lelon pelfɔt puexa pejewliajwa. Japapelfɔtat pawɔlan lelon nosaxaelpi japon pejew japon pejwɔlela. Baxael, japon tɔp wut, puexa japon pejjiwpi kaenanɔla chiekal matabijaxael, nosaxaelpi naetɔpon pejew. Japon laeja wɔtfɔk, pelfɔt, pajut lelpox, pa-oma-elfɔk. Pe japon aton tɔp wut, japox pelfɔt pa-omliso. Samata, japon pejjiw chiekal diajkaxael, me-ama pelfɔt lelpox jɔm-aech, japi jiw kaenanɔla nosliajwa pejewaxaelpi. **18** Ja-aechlap-is Moisés chajia lelpox israelitas naexasisliajwa. Choef xua'at wuti ofrenda isliajwa Diosliajwa, Moisés lelpox pa-om. **19** Moisés pajut chiekal chanaekabuana puexa israelitas naexasisliajwa Dios tato'alpoxan. Do jawɔt, fiton cha-aelnaedalach. Japox pawɔl hisopo. Jawɔx pasoeimɔat, lanamɔat, nae-oefxakoeyapon. Japox xatho'bala jalmint poxadik. Japajalmint tania las, torjal, chivojal, min sɔapichbej. Moisés japajalmint pajut lelpox matsasalton. Do jawɔt, puexa israelitas matsasaltbejpon. **20** Jawɔt jɔm-aechon puexa israelitasliajwa: “Xamal matsasaltax choefjal mint. Samata, naexaxisaxaelam xan lelpox. Ja-am wut, Dios isaxael jɔmdutpox xamalliajwa” —aech Moisés israelitasliajwa. **21** Jawɔtbej Moisés japajalmint matwɔajsasalt Dios pejtabernáculoba. Matsasaltbejpon sacerdotes xanbistpoxan japabaxot. **22** Moisés chajia lelpox to'a puexa xanbistpoxan matsasalsliajwa choefjalmin, japoxan puexa chiekal pachaemliajwa Diosliajwa. Jatislap-is puexa israelitasliajwa. Choef xua'la-el wuti ofrenda isliajwa Diosliajwa, ja-aech wut, ajil Dios jiw beltaeliajwa babijaxan ispoxanliajwa.

### Dios nakbeltaenpox xatis babijaxan isaspoxanliajwa, Jesús t̄p xot cruztat

**23** Moisés chajia choefjalmin matw̄ajsasalt Dios pejtabernáculoba ampathatat. Matsasaltbejpon puexa sacerdotes xanbistpoxan japabatat. Japox ispi puexa jiw matabijaliajwa asamatkoi Cristo t̄paxaelpox ampathatpijiw bu'w̄ujanjilaliajwa Diosliajwa. Cristo choefjaltat Diosxotse matw̄ajsasals-el Dios pejtabernáculoba. Cristolax pajut natapaei asajiw boesaliajwas. Samata, Cristo t̄p w̄t cruztat, Dios beltaen ampathatpijiw babijaxan ispoxanliajwa. **24** Cristo t̄p w̄t, mat-echpon pejme dukaliajwa. Do jaw̄t, ath̄u poxasepon nabichliajwa Dios pejtabernáculobaxotse. Jaxotse pax Dios pejiw̄ajnalel kaw̄ajnaf̄ul xatisliajwa. Dios pejtabernáculoba ampathatpijax, japox, meama Dios pejtabernáculoba Diosxotsepox, jakabūan-aechox chiekal. **25** Puexa sacerdotespaklokolan, kaewaechf̄ul w̄t, choefjal chaxlowpon tabernáculobatata, Lugar Santísimoxot, ofrenda isliajwa Diosliajwa. Pe Cristo kaewaechf̄ul t̄paf̄ulaxil. Kaet̄paxtat jiw bu'wiapon. Samata, Cristo pejme t̄paxil jiw bu'w̄ujanjilaliajwa Diosliajwa. **26** Cristo t̄p kaeveces. Jachi-el w̄t, kaewaechf̄ul w̄t, Dios to'axael Cristo t̄paf̄ulaliajwa jiw bu'w̄ujanjilaliajwa Diosliajwa. Ampamatkoiyan, Cristo kaeveces ampathatat nalaelt boesaliajwas puexa jiw babijaxan ispoxanliajwa. Cristo boesaspox pomatkoichaliajwa. **27** Puexa jiw, ampathatpijiw, peimatkoï wepach w̄t, t̄paxael kaeveces. Do jaw̄x, Dios jumchiyaxaesi kaenan̄la babijaxan ispoxanliajwa kastikaliajwas. **28** Jasoxtatbej Cristo t̄p cruztat kaevecesliajwa. Pajut natapaeipon asajiw boesaliajwas, xabich jiw babijaxan ispoxanliajwa. Jaw̄x pax Dios poxasepon. Asamatkoi pejme pasaxoekon. Pask w̄t, pejme jiw boesaxisalpon t̄paliajwa jiw babijaxan ispoxan ajilaliajwa. Japon pasaxoek jiw bu'w̄eliajwa, japi jiw w̄ajnawetpi japon pejpasax.

**10** Moisés chajia lelpox pachaem israelitas naexaxisliajwa. Japox amw̄tjel xatis matabijas. Pe kaes pejme pachaem Cristo ispox xatis naexaxisliajwas. Xabich chajia w̄ajna, Jesús pas-el w̄t̄fuk, Moisés chajia lel w̄t, to'a sacerdotes isaxaelpoxan isliajwa. Samata, sacerdotes kaewaechf̄ul w̄t, choef x̄ua'at ofrenda isliajwa Diosliajwa, Dios beltaeliajwa jiw babijaxan

ispoxanliajwa. Pe jiw nakiowa babijaxan isfɔl Diosliajwa. **2** Sacerdotes choef xɯa'at ofrenda isliajwa Diosliajwa. Japox is wɯti, jiw babijaxan ispoxan kaelel wejila-esal. Jiw babijaxan ispoxan kaelel wejilaxaes wɯt, japi jiw kaenanɯla chiekal nejchaxoelaxael: “Xan babijaxan ispoxan nawe-ajil Diosliajwa” —chiyaxaeli, nejchaxoel wɯt. Ja-aech wɯt, kaes choef xalalaeɣaxili sacerdoteslel, japi sacerdotes choef xɯa'asliajwa ofrenda isliajwa Diosliajwa. **3** Kaewaechfɔl wɯt, sacerdotes choef xɯa'at ofrenda isliajwa Diosliajwa jiw nejchaxoelaliajwa majt babijaxan ispoxanliajwa. **4** Sacerdotes xɯa'at wɯt toros, chivosbej, japajal pijaxtat jiw babijaxan ispoxan kaelel wejila-esal Diosliajwa.

**5** Samata, Cristo pasliajwa wɯt ampathatasik, jɯm-aechon pax Diosliajwa:

“Ax, xam chiekal nejchachaemla-emil, sacerdotes choef xɯa'at wɯt, xamliajwa ofrenda is wɯti jiw babijaxan ispoxan beltaeliajwam. Samata, xan nato'axaelam nalaelsliajwan thatxotdik, me-ama yamxi nalaela wɯt, jachiliajwan. Do baxael, nato'axaelambej tɯpaliajwan puexa jiw babijaxan ispoxanliajwa, japi jiw bɯ'wɯajanjilaliajwa.

**6** Sacerdotes choef xɯa'at bowaliajwa altarmatwɯajtat ofrenda isliajwa xamliajwa, xam beltaeliajwam jiw babijaxan ispoxanliajwa. Pe xam chiekal nejchachaemla-emil japoxanliajwa.

**7** Samata, xan amxotx isliajwan xam nejxasinkampox, me-ama nejamechan, chajia lelpox, jɯm-aech wɯt, jɯm-aechox xanliajwa” —aech Cristo Diosxotse pax Diosliajwa.

**8** Cristo japox jɯm-aech xot, matabijas Dios chiekal nejchachaemla-el, sacerdotes choef xɯa'at wɯt ofrenda isliajwa japonliajwa. Jasox jɯm-aech Moisés chajia lelpox sacerdotes isliajwa japox. Pe nakiowa, Dios chiekal nejchachaemla-el japoxliajwa. **9** Cristo pejme jɯm-aech pax Diosliajwa: “Xan amxotx isliajwan xam nejxasinkampox” —aechon. Samata, Cristo tɯp ampathatat puexa jiw bɯ'wɯajanjilaliajwa Diosliajwa, Dios to'as xoton. Samata, jawɯt toep sacerdotes choef xɯa'atpox ofrenda isliajwa Diosliajwa. **10** Cristo is Dios nejxasinkpox. Samata, Cristo pajut natapaei asajiw boesaliajwas puexa jiw

bɸ'wɸajanjilialijwa Diosliajwa. Cristo tɸp wɸt, japox patɸpax kaevecesliajwa, pomatkoichaliajwabej.

**11** Sacerdotes pomatkoicha choef xɸa'at ofrenda isliajwa Diosliajwa. Sacerdotes japox is wɸt, Dios kaelel wepels-el jiw babijaxan ispoxan japi bɸ'wɸajanjilialijwa. **12** Me-ama sacerdotes ispox, jasox is-el Jesucristo. Japon pajut natapaei asajiw boesaliajwas puexa jiw babijaxan ispoxanliajwa. Japon kaetɸpaxtat jiw bɸ'wiapon. Do jawɸx, Jesucristo Dios poxase. Jaxotse ek pax Dios poklalel. **13** Jesucristo jaxotse wɸajnawet pax Dios malechaliajwa japon padaelmajiw, japi naexaxisliajwa japon tato'alpoxan. **14** Cristo tɸp wɸt japox kaevecesliajwa, jawɸt Dios naexasiti bɸ'wɸajanjillisi pomatkoichaliajwa Diosliajwa, babijaxan ispoxanliajwa. **15** Espíritu Santo nakkajachawaet xot, matabijas, diachwɸajnakolax Cristo tɸp xatisliajwa. Dios jɸm-aech:

**16** “Asamatkoi tajjiw kajachawaesaxaelen chiekal matabijaliajwa tajjamechan. Samata, tajjamechan naexasisaxaeli.

**17** Xan kaes nejchafaesaxinil japi babijaxan ispoxanliajwa” —aech Dios.

**18** Samata, Dios beltaen wɸt jiw babijaxan ispoxanliajwa, ja-aech wɸt, kaes choef xɸa'asaxili ofrenda isliajwa Diosliajwa.

### **Wajnejchaxoelaxantat moxaxaespox Diosxot**

**19** Takoew, Cristo tɸp xot, xatis bɸ'wɸajanjisal Diosliajwa. Samata, amwɸtjel Dios naktapaei wajnejchaxoelaxantat nejmach chiekal moxaliajwas Diosxotse, Dios pejtabernáculobaxot, Lugar Santísimoxot. **20** Cristo tɸp xatis bɸ'wɸajanjilialijwas Diosliajwa. Samata, japon, me-ama pajelt nɸamt wɸt, ja-aechon xatis pasliajwas Diosxotse. Samata, Dios naktapaeyaxael pomatkoicha duilialijwas jaxotse. **21** Jesús wajsacerdotekolan tataefɸl Dios pejtabernáculoba Diosxotse. **22** Samata, puexa wajnejchaxoelaxantat moxaxaes Diosxotse, chiekal matabijas xot, Dios diachwɸajnakolax nakbɸ'weyaxael. Xatisbej matabijas, Dios nakbeltaen xatis babijaxan isaspoxanliajwa. Samata, me-ama nawaenspi wɸt, jatis. Samatabej, me-ama bɸ'asjisal wɸt, jatis Diosliajwa. **23** Nejchaxoels wɸt Dios nakbɸ'weyaxaelpoxliajwa, nejchaxoelaxisal: “Dios bej nakbɸ'weyaxilbej” —chiyaxisal, nejchaxoels wɸt. Dios isaxael nakjɸmdutpox xatisliajwa.

**24** Nejchaxoelaxaes nakaewa nakajachawaesliajwas. Jatis wut, kaes pejme pachaemaxaes. Isaxaesbej pachaempoxan nakae-waliajwa. **25** Asew jiw xatisxot kofa culto ispoxan. Xatislax kofaxisal. Nakaewa naewuajnaes kaes Dios xanaboejalijwas. Jasox isaxaes, matabijas xot matkoijan moxsfulpox wajpaklon Jesucristo pejme pasliajwasik.

**26** Xatis chiekal matabijas, Cristo tup cruztat nakwemosliajwa xatis babijaxan isaspoxanliajwa. Pe jawut, xatis babijaxan isfulas wut, jatis wut, Dios beltaeyaxil babijaxan isaspoxanliajwa, kaes asan ajil xot pejme tupaliajwa, xatis bu'wuajanjilaliajwa. **27** Babijaxan kaes isfulas wut, kaeyax nakwewe'paxael. Japox kastikax, xabich chaemilpox. Jawut jit itkawa-elpoxtat Dios nakkastikaxael chiekal naktoejafaliajwa japajitat, puexa Dios padaelmajiw sapich. **28** Chajiakolaxtat aton naexasis-el wut Moisés chajia lelpox, kolenje, o, tres aton, taens wut japon ispox, ja-aech wut, tasalas. Do ja-aech wutbej, japi jiw beltae-esal. To'as beliajwas. **29** Dios xabich kaes kastikaxael kofapi Jesucristo pejuwan naexasitpox. Japi nejchaxoel wut, jum-aechi: “Jesucristo tup wut, japox ma-aech asbuan jumch xatis babijaxan isaspoxan nakwemosliajwa” —aechi. Japi jum-aechbej babejjamechan Espiritu Santoliajwa, xatis naknejxasinkpon. Dios paxulan diachwuajnakolax tup japi jiw babijaxan ispoxanliajwa, bu'wuajanjilaliajwa. **30** Xatis matabijas Dios jum-aechpox: “Asew jiw babijaxan is wut asew jiwliajwa, japi xan kastikaxaelen” —aechox. Dios jum-aechbej: “Jiw babijaxan ispi xan kastikaxaelen. Asew jiw lax, babijax is-elpi, japi jiw kastikaxinil” —aech Dios. **31** Dios tupaxilpon. ¡Japon pejkastikax xabich chaemil!

**32** Xamal nejchaxoelam wut, nejchaxoelde, akasestat Jesús pejuwan naexasitam wut! Japamatkoijan xamal xabich nabijatam, asew jiw babijaxan is wut xamalliajwa, naexasitam xot Jesús pejuwan. Ja-am wut, xamal kofa-emil. Nakiowa Jesús pejuwan naexasisfulam, Dios xamal kajachawaesful xot. **33** Asew xamalxot jumtis babejjamechan asew jiw pejuwanalel, Jesús pejuwan naexasit xoti. Japi jiw nabijat asew jiw pijaxtat. Ja-aech wut, xamalxotpijiw, asew jiw pejlewla-el itpaeliajwa japibej naexasitpox Jesús pejuwan. **34** Asew jiw, naexasiti Jesús pejuwan, jiw jebatat jias wut, xamal japi jiw kaja-chawaetam wewe'paspoxanliajwa. Asew jiw xamal wenot wut nejew, xamal Jesús pejuwan naexasitam xot, nalala-el.

Nakiowa nejhachaemlam nejmatpuatantat Diosliajwa. Ja-am xamal, wuajnowetam xot kaes pejme pachaempox Diosxotse, pomatkoichaliajwapox. **35** Samata, xamal nabej kofe' Dios xanaboejampox! Ja-am wut, Dios xamal chaxduiyaxael xabich pachaempoxan japonxotse. **36** Xamal nabijatam wut, nxakiowa isfulde, me-ama Dios nejxasink! Ja-amfulam wut, Dios xamal chaxduiyaxael jumdutpox. **37** Dios pejjamechan, chajia lelspox, jum-aech wut, jum-aechox Dios jum-aechpox Cristo pejme pasaxoekpoxliajwa: “Kamtalejen pasaxoekon. Piach kijlaxilon pasliajwa.

**38** Tajjiw isful wut xan nejxasinkaxpoxan, xan naxanaboeja wuti, japi duilaxael pomatkoicha xanxotse. Pe asew jiw kofa wut naxanaboejapoxan, ja-aech wut, xan nejchachaemlaxinil japi jiwliajwa” —aech Dios jum-aechpox.

**39** Xatislax kofa-esal Dios xanaboejaspox napelsasamatas Diosliajwa. Xatis chiekal Dios naexasisfulas wut, jatisfulas wut, japon xatis nakbu'weyaxael.

### Jiw xanaboejapox Dios

**11** Xatis chiekal Dios xanaboejas wut, jatis wut, kaenanula chiekal nejchaxoelaxaes ampox: “Dios jum-aechpox diachwuajnakolax jachiyaxael. Xan tae-enil wut japox, nakiowa matabijtax jachiyaxaelpox. Japox Dios isaxael” —chiyaxaes kaenanula, nejchaxoels wut. **2** Wajwuajnapijiw chiekal naexasisful Dios jumtisopox. Japi kaenanula chiekal nejchaxoel: “Diachwuajnakolaxdo', Dios najum-aechpox xanliajwa” —aechi, nejchaxoel wut. Samata, Dios nejchachae-mil wajwuajnapijiwliajwa.

**3** Xatis chiekal Dios xanaboejas xot, matabijas, Dios is ampthat, thatbaxobej, jum-aech wuton. Puexa amwutjel taenspoxan, japoxan puexa taens, Dios is xot. Amwutjel taenspoxan, majt japoxan chiekal ajil.

**4** Chajiakolaxtat Abel chiekal xanaboejt Dios. Samata, Abel naexasit Dios tato'alpox. Samata, Abel ofrenda is wut Diosliajwa, japox xabich pachaem. Me-ama Cain pijax ofrenda, jachi-el Abel pijax ofrenda. Samata, Abel babijaxan ispoxanliajwa bu'wuajanjilon Diosliajwa. Japon Abel chajiakolaxtat boesas wut, tupon. Pe nakiowa, ampamatkoijan Abel Dios xanaboejtpox nakiowa wultaeflas. Samata, xatisbej Dios chiekal xanaboejaxaes.



**5** Chajiakolaxtat Enochej chiekal Dios xanaboejt. Samata, Dios bu'fason tathualin athu poxase. Kaes pejme faena-esal, Dios bu'fos xoton. Dios pejjamechan, chajia lelspos, jum-aech wut, jum-aechox: “Enoc Dios bu'floe-esal wutfuk, Dios nejhachaemil japonliajwa” —aechox. **6** Dios nejhachaemla-el, jiw xanaboeja-el wuti japon. Jiw xanaboejalijwa wut Dios, japi jiw matxoela chiekal nejhaxoelaxael ampox: “Diachwujnakolax Dios duk athuxotse. Samata, Dios nabu'weyaxael, wulwekx xot Dios taj-nejhaxoelaxtat” —chiyaxaeli, nejhaxoel wut.

**7** Chajiakolaxtat Noé chiekal Dios xanaboejt. Dios jumtis wut matabijsliajwa puexa ampathat bu'laxaelpox, Noé chiekal naexasit. Samata, Dios kito'aspon pinjiyax barkam isliajwa bu'welijwapon pejjiw. Noé, pejjiw suapich, Dios naexasit xoti, japi babijaxan ispoخانliajwa bu'wujanjil Diosliajwa. Japamatkoian puexa jiw, potujnuchanpijw, chiekal bu'al, Dios naexasis-el xoti.

**8** Chajiakolaxtat Abrahambej chiekal Dios xanaboejt. Dios to'as wut nakolsliajwa pejtujnuxot, naexasiton. Samata, Abraham fulaech Dios chaxdusaxaestuajnu poxade. Jawut Abraham chiekal matabijs-elon, fulaeyaxaech poxade. **9** Abraham pat wut Dios jumduchtujnuxot, japatujnuxot asajiw wujna duil. Abraham naexasit jumduchpox. Samata, japatujnuxot dukjepon. Abraham chimiaba is-el japatujnuxot. Dukjepon carpabatat. Baxael, asamatkoian, Abraham paxulan Isaac, Abraham pamon Jacobbej, japi carpabachantat duilalap japatujnutat. Japibej Dios jumtis asamatkoi chaxdusliajwas japatujnu. **10** Abraham laeja wut, wujnawesfulon asamatkoi Dios bu'flaelijwas athu poxase, pomatkoicha dukaliaw Dios pajut ispaklowaxxotse. Samata, Abraham dukje carpabatat asbuan jumch.

**11** Chajiakolaxtat Abraham pijow, Sarabej, chiekal Dios xanaboejt. Samata, japow xabich pati'ow wut, naxawal, Dios jumduch xotow. **12** Abraham pijow naxawal wut, Abraham xabich pati'in. Pe nakiowa, Abraham paxulan nalaelt. Do baxael, Abraham pejwulela, xabich kaesful pamojiw. Me-ama ithaej, thaejbelinbej, xabich pin-iakola, ja-aechful Abraham pamojiw. Samata, xajupaxil xajuiliawwas japi jiw.

**13** Chajiakolaxtat puexa, japi chiekal Dios xanaboeja hasta pejpatupaxtat. Dios jumduchpoxan chaxduiliajwas, japi japoxan

naetupaful chaxdui-esalpoxtat. Pe nakiowa, japi chiekal mata-bija pejwulela Dios jumdutpoxan asamatkoi chaxduiyaxaespox japi pamojiw. Samata, japi xabich nejchachaemil. Japi pajut chiekal matabija xot, jum-aechi: “Xatis ampatuajnuhot asbuan jumch nanuamspijwas. Wajtuajnuholax ajil pomatkoicha xatis duilaliajwaspox” —aechi. **14** Japox jum-aech wuti, xatis matabijas japi wuaj nawesfulpox, asamatkoi Dios buflaeyaxaespox athu poxase, Diosxotse, pomatkoicha duilaliajwapi. **15** Japi nejchaxoel wut, nejchaxoela-el kaxa nawelajwa Abraham nakoltuajnuhot. Naweyax nejchaxoelaxael wut, japi naweyaxael japatuajnu poxade. **16** Pe japi kaes nejxasink Dios poxaliajwase, jaxotse kaes pejme pachaem xot. Me-ama ampathatat, jachi-el jaxotse. Samata, Dios nejchachaemil japiliajwa jumchiliajwapon: “Ampi tajjiw” —chiliajwapon japiliajwa. Dios chaemt paklowax, pejiw pat wut japapaklowaxxot duilaliajwase.

**17-19** Dios chajia jum-aech Abrahamliajwa: “Naxulan Isaac asamatkoi xabichaxael pamojiw” —aech Dios. Do asamatkoi, Abraham Dios xapaejtas wut, kito'as paxulan Isaac xua'laliajwapon ofrenda isliajwa Diosliajwa. Jawut Abraham ow-aech. Samata, Abraham xua'laliajwa wuton paxulan Isaac, nejchaxoelon: “Dios xajup tupi mat-elajwa pejme duilaliajwa” —aech Abraham, nejchaxoel wut. Samata, Abraham xua'laliajwa wuton paxulan, jawut Dios kifiachpon. Do jawut, Abraham paxulan xua'la-el wut, ja-aech wut, Abrahamliajwa Isaac, me-ama Dios mat-ech wut, ja-aechon pejme dukaliajwa.

**20** Abraham xabich Dios xanaboejsful. Abraham paxulan, Isaac, japonbej Dios chiekal xanaboejsful. Samata, Isaac xabich pati'in wut, jum-aechon paxulan Jacobliajwa, Esaúliajwabej. Kaenanula japiliajwa jum-aechon: “Dios xam kajachawaesfulaxael” —aech Isaac.

**21** Isaac paxulan, Jacobbej, chiekal Dios xanaboejsful. Samata, baxael, asamatkoi, Jacob mox pawuajna wut tupaliajwa, japon kaenanula José paxiliajwa Dios kawuajan asamatkoi japi Dios kajachawaesfulaliajwas. Jacob jum-aech kaenanula japiliajwa: “Dios xam kajachawaesfulaxael” —aech Jacob. Do jawut, Jacob Dios kawuajan wut, jum-aechon Diosliajwa: “Xam xabich pachaemam” —aech Jacob, kilamamsnik wut pejkilachalanaeya.

**22** Chajiakolaxtat Jacob paxulan, José, japonbej chiekal Dios xanaboejsful. Samata, José mox pawuajna wut tupaliajwa,

jum-aechon israelitas asamatkoi nakolaxaelpox Egipto tujnuxot. Do jawut, José to'anadoft, asamatkoi israelitas Egipto tujnuxot kaelel nakola wut, japi chaxlaelajwa José pejb'u't.

**23** Chajiakolaxtat Moisés pax, japon penbej, japi chiekal Dios xanaboejafulbej. Faraón, puexa Egipto tujnupijiw tato'lan, japon israelitas kito'a, paxi poejiw nalaela wut israelitas kamta beliajwapi paxikola. Moisés nalaelt wut, pax, japon penbej, japi pejlewla-el owchilaliajwa rey Egipto tujnupijiw tato'lan kito'aspoxliajwa. Moisés xabich chamian xot, pax, pen suapich, moesti tres juimtje. Do baxael, faraón paxulow fitow chaxti'aliajwas Moisés.

**24** Moisésbej chiekal Dios xanaboejsful. Chiekal ti't wut, Moisés nejchaxoel: “Xan nejwesla jiw kaes najumchiliajwa: ‘Moisés, faraón paxulow paxulan’ —nachiliajwa” —aech Moisés, nejchaxoel wut. **25** Do jawut, Moisés nejchaxoelbej: “Tajjiw israelitas, Dios pejjiwpi. Samata, tajjiw xan kaja-chawaesaxaelen. Tajjiw nabijat, Egipto tujnupijiw xabich nabichax to'as xoti. Xanbej naknabijasaxaelen, japi suapich” —aech Moisés, nejchaxoel wut. Moisés nejwesla dukaliajwa Egipto tujnupijiw xot, Egipto tujnupijiw babijaxan ispoxan nak-isasamatapon. **26** Moisés Dios xanaboejt bu'weyaxaesopox Egipto tujnuxot puexa japon pejjiw, israelitas suapich. Samata, Moisés matabijt xot, nejchaxoelon: “Asamatkoi Mesías, Dios makafisaxaespon, japon xabich nabijasaxael. Samata, xanbej amwut nabijasaxaelen Egipto tujnupijiw pijaxtat. Ja-an wut, xan isaxaelen Dios nejxasinkpox. Dios nachaxdusaxaelpox Diosxotse, kaes pejme xabich pachaemaxael. Me-ama Egipto tujnupijiw pejew, pachaempoxan, jachi-el Dios nachaxdusa-xaelpox” —aech Moisés, nejchaxoel wut.

**27** Moisés xanaboejt Dios kajachawaesaxaesopox. Samata, Egipto tujnuxot Moisés chijiapon. Faraón palala wut japonliajwa, pejlewla-elon faraónliajwa. Dios, taeyaxisalpon, Moisés is japon to'aspoxan. Pe Moisés, me-ama pajut chiekal Dios taen wut, ja-aechon. Samata, japon Dios xanaboejsful. **28** Moisés chiekal Dios xanaboejt xot, kito'apon israelitas xua'asliajwa ovejas, Pascuafiesta isliajwa wut. Moisés kito'abej kaenanula israelitas, paxipi, bafafachanlelan joelaliajwa ovejal. Japox is israelitas japi paxi, matxoelanalaelapi, poejiw, Dios pej-ángel wematkaesasamatas.

**29** Chajiakolaxtat israelitasbej chiekal Dios xanaboejaful. Samata, israelitas Mar Rojo likaliajwa wut, min najupanadijan Dios pijaxtat. Japox put, me-ama mintata-el wut, ja-aech. Chiekal mamu'al. Israelitas japoxade fulaech likaliajwa. Do jawut, Egipto tuajnuapijw, soldaw, japoxadin fulaen wuchakal. Jawut, min namatawaekcha wut, puexa Egipto tuajnuapijw, soldaw, chiekal bu'al.

**30** Israelitasbej chiekal Dios xanaboejaful xot, siete matkoian masajajianpi Jericó paklowax tathoetlel, ia' xajajialspx. Japox xabich pinjiyax, athubejpx. Jawut japox tatakpxatat puexa natacholan Dios pijaxtat. **31** Jericó paklowaxpijwxot pawis duk. Pe asamatkoi, Dios xanaboejtow. Japow pawul Rahab. Japow pejbichax, poejw bu'moejsax, plata kanaliajwa. Kolenje israelitas pat wut chawuajnataenpi japapaklowax, japow chiekal bu'kult, japi israelitas pat wut japow pejbaxot. Do jawutbej, kajachawaetow japi weliajwa. Samata, asamatkoi, israelitas naba wut, Dios naexasis-elpi suapich, Jericó paklowaxpijw suapich, japow boesa-esal, Dios xanaboejt xotow.

**32** Amwutjel tiempo nawewe'p xot, kaes lelaxinil a sew jiwliajwa, Dios xanaboejapiliajwa. Samata, lelaxinil Gedeón pejwujan, Barac pejwujanbej, Sansón pejwujan, Jefte pejwujanbej, David pejwujan, Samuel pejwujanbej, kaes a sew jiw, profetas pejwujanbej. **33** Puexa japi jiw chiekal Dios xanaboeja, laelp wuti. Samata, israelitas, asatuajnuapijw suapich, naba wut, padaelmajiw xabich malechapi, Dios kajachawaech xoti. A sew japixot makanoch paklochowliajwa. Japi paklochow wut, chiekal jiw tato'al, Dios kajachawaesfulas xot, me-ama Dios chajia jumdut japiliajwa. A sew japixot peltas xabich leónxot xaeliajwas. Jatis wuti, Dios kajachawaech japi xae-elaliajwas leónes. **34** A sew japixot peldas jit tamdadut poxade. Jatis wut, Dios kaja-chawaech xot, japi toejwa-esal. A sew japixot espadatat beliajwas wut, Dios kajachawaech japi weliajwa. A sew japixot majt chiekal matabija-el nabeliajwa, asatuajnuhanpijw suapich. Baxael, japi chiekal matabija nabeliajwa, Dios kajachawaech xoti. Samata, japi malecha padaelmajiw. **35** A sew watho', chiekal Dios xanaboejapi, pejjw tup wut, Dios wemat-echpi, japi jiw pejme duilaliajwa.

A sew jiw Dios chiekal xanaboeja. Japi xabich nabijatbej a sew jiw pijaxtat kofaliajwapi Dios naexasitpox. Pe

ja-aech wut, japi kofa-el Dios naexasitpox, japi kaenanula nejchaxoel xot: “Kaes pejme pachaem dukaliajwan Diosxotse. Me-ama ampathatat, jachi-el” —aechi, nejchaxoel wut. Ja-aech wut, japi jiw baes. **36** Asew, Dios xanaboejapi, xabich itxaelaxafafolspi. Xabich seltasbejpi. Asew m̄axwasixawaeks cadenam̄atat. Jiasbejpi jiw jebachantat. **37** Asew, Dios xanaboejapi, ia'tat matkaejabas, dadaps wut. Asew fatarariowlas. Asew baes espadatat. Asew naxoei ovejabu'an, o, chivobu'an, xabich kijil xoti. Xabich nabijat japi jiw. Japi jiw taduktas at̄aj. **38** Japi jiwlap, majt nabijatpi, japi jiw xabich pachaem, Dios xanaboeja xoti. Me-ama asew jiw ampathatpijiw, jachi-el japi jiw. Pe nakiowa, nabijati. Nan̄amti pajilaxanxot, m̄axanxotbej. Duilpi pinam̄axanw̄ajantat. Japixot asew duilbej pinam̄uthanxotdik.

**39** Puexa, japi jiwlap, majt nabijatpi, japi chiekal Dios xanaboeja. Pe nakiowa, kaen japixot Dios chaxdus-esalfuk j̄mtispox. **40** Dios chajia j̄m-aech japi w̄aj nawesfulaliajwafuk japox. Dios xatis matxoela naktapaeyaxael wut Diosxotse duilaliajwas, ja-aech wut, majt nabijatpi bej tapaeyaxaes pomatkoicha duilaliajwa Diosxotse.

### Wajpaklon Jesucristo xanaboejaxaes pox

**12** Xatis chiekal matabijas, wajw̄ajnapijiw xabich nabijat wut asew jiw pijaxtat, japi kamta palala-el, Dios chiekal xanaboeja xoti. Xatisbej jachiyaxaes, nabijatas wut. Isfulaxaes puexa wajpamamaxtat Dios nejxasinkpoxankal. Samata, kofaxaes asaxan it-elbalapoxan isaxaelpoxan is-elaliajwas. Kofaxaesbej babijaxan isfulaspoxan, naktabejsfulpoxan wajnejchaxoelaxan Dios xanaboejaspoxanliajwa. **2** Wajpaklon Jesucristo chiekal naexasisfulaxaes. Japon pijaxtat xatis Dios naexasich. Japon pijaxtatbej Dios chiekal naexasisfulaxaes pomatkoicha. Cruztat t̄pax japox xabich padaeyaxkolax. Pe Cristo padala-el cruztat t̄paliajwa xatisliajwa, japon chiekal matabijt xot, pejnabijasaxw̄x cruztat, xabich nejchachaemla-xaelpox. Amw̄tjel Cristo ek pax Dios poklalel puexa jiw tato'laliajwa, pax Dios s̄apich.

**3** Xamal nejchaxoelam wut, ¡nejchaxoelde Jesús xabich nabijatpox, jiw babejchow babijaxan is wut Jesúsliajwa! Samata, xatisbej kofaxisal Dios xanaboejaspox, asew jiw babijaxan is

wut xatisliajwa. **4** Xamal nabijatam wut, nabijas-emil, me-ama Cristo. Samata, ¡boejtaliasfulde babijax isasamatam! **5** Xatis Dios paxis. Samata, nejkiowaxisal Dios naknaewuajanpoxan. Dios pejjamechan, chajia lelspox, jum-aech wut, jum-aechox:

“Wua, ¡nabey naexasisle' Dios fiatpox!

¡Nabey kofe'bej Dios xanaboejampox!

**6** Aton, Dios nejxasinkaspon, japon Dios fiach babijax is-elaliajwa. Dios kastikaxaesbejpon, babijaxan is wut, japon aton, me-ama Dios paxulan wut, ja-aech xoton”  
—aech Dios pejjamechan, chajia lelspox.

**7** Dios xamal kastika wut, ¡boejtaliasfulde! Jasoxtat Dios xamal kastika, japon paxim xot. Jiwbej paxi kastika, babijaxan is wut. **8** Babijaxan isam wut, Dios xamal fias-el wut, kastika-el wutbejpon, diachwuajnakolax xamal Dios paxikola-emil. Dios paxikolam wut, babijaxan isam wut, Dios xamal kastikaxael. **9** Xatis jams wut, babijaxan isas. Jatis wut, kaenanula waj-axjiw nakfiat. Nakkastikabej. Samata, ampathatat waj-ax sitaens. Samatabej, jamwutjel kaes pejme naexasisaxaes waj-ax Dios, japon athuxotsepon, jaxot duilaliajwas pomatkoicha! **10** Xatis jams wut, waj-ax nakfiat. Nakkastikabejpi, babijaxan isas wut. Ja-aech, waj-ax nakkastika wut, me-ama japi nejchaxoel. Dios, xabich kaes pejme matabijt. Samata, xatis babijaxan isas wut, nakfion. Nakkastikabejpon kofaliajwas babijaxan isaspoxan, xatis chiekal pachaemaliajwas, me-ama Dios pachaem, jachiliajwas xatis. **11** Babijaxan isas wut, Dios nakkastika wut, jawut nejchachaemla-esal. Jawutbej, naliuxt xaeyaxkal. Kofas wut babijaxan isaspoxan isliajwas pachaempoxan, jatis wut, chiekal duilaxaes Diosliajwa.

### **Chachoelpox, naexasis-esal wut Dios**

**12** Dios xamal fiat wut, kastika wutbejpon babijaxan isam xot, ¡xamal nejchachaemlafulde, jasoxtat Dios kajachawaesfulaxael xot! **13** Xamal nejchaxoelam wut, ¡nejchaxoelde pachaempoxan! ¡Japoxan chiekal isde! Xamal ja-am wut, asew jiw chiekal duilaelpi, pajut matabijaxael. Ja-aech wut, japi xamal nakxataeyaxael isliajwapi pachaempoxan.

**14** ¡Chiekal pachaemde asew jiwliajwa, duilam wut! ¡Xamal duilafuldebej, me-ama Dios nejxasink! Jiw, babijaxan ispi, pasaxil Diosxotse. **15** Dios xabich pachaem xatisliajwa.

Samata, ¡nabej kofe' Dios naexasitampox! ¡Chiekal taem babijax isasamatam! Isam wut babijax, asew jiw, Dios xanaboejapi, japox taen wut, japibej isaxael japox babijax. **16** ¡Xamal asew watho' nabej bu'moejs! Nejaxoelam wut, ¡nabej nejaxoele': "Xan nawewe'pa-el Dios pejkajachawaesax" —chiyaximil, nejaxoelam wut! Chajiakolaxtat Esaú matxoelapijin xot, xabich kaes pax pejew nosaxaelon, pax naetup wut. Pe asamatkoi, Esaú xabich litaxaela wut, asbuan jumch pakoewanxot kaenaxaeyaxtat xanafonpon pax pejew, japon nosaxaelpi, pax asamatkoi naetup wut. **17** Xamal chiekal matabijam, baxael, Esaú jum-aech paxliajwa: "Ax, ¡xam Dios kawuajande xanliajwa, pomatkoicha Dios nakajachawaesliajwa!" —aechon paxliajwa. Pe pax owchi-esalpon. Samata, jawut Esaú xabich wanow, japox kaes ajil xot japonliajwa.

**18** Xamal, Jesús pejwujajan naexasitampim, amwutjel tae-emil majt wajwujajnapijiw taenpoxan. Chajiakolaxtat wajwujajnapijiw, israelitas, pat pinjiyax muaxxot. Jaxot itkua'nik wut, japi taen pinjiyax jit, japamuaxmatwujat xabich itliak wut. Do jawut, xabich pina-iambej. **19** Jawutbej wajwujajnapijiw thiataenpi trompeta nababapox. Jumtaenbejpi, Dios naksiyas wut japiliaw. Jawut xabich pejlwla xot, jum-aechi Dios kaes naksiya-elaliajwas japiliaw. **20** To'as wut, Dios jumtispi: "Nejmach-aton ampamuaxxot julan wut, japon aton ia'tat dadaepaxaelam matkaejabaliajwampon. O, lanzatat chaxpiyaxaelampon. Jachiyaxaelambej, choefan wut" —tispi Dios wajwujajnapijiw. **21** Wajwujajnapijiw japox jumtaen wut, xabich pejlwlap. Moisésbej jum-aech: "Xan tajlewt tathulax" —aech Moisés.

**22** Xatis Jesús pejwujajan naexasich xot, wajnejchaxoelaxtat moxslis pinamuax, pawulpox Sión, Dios dukxot, Jerusalén paklowaxxotse. Japapaklowaxxot natameja ángeles xabich piniaakola. Japi jum-aech Diosliaw: "Xam xabich pachaemam" —aech ángeles Diosliaw. **23** Dioslap juez puexa jiwliaw. Xatis mox soepas, Diosxotse, asew jiw suapich, japi naexasiti Jesús pejwujajan. Japi pejwulan wecha-oels Diosxotse. Jiw chajia wujajna tupi, japi jaxotse taeyaxaesbej. Dios beltaen japi babijaxan ispoxanliaw. **24** Xatis naexasich Jesús tuppox xatisliaw. Jesús boesas wut, nakwemot babijaxan isaspoxanliaw, Dios nakkastikasamata. Samata, amwutjel Diosliaw babijaxan

isaspoxan bu'wujajjisal. Chajiakolaxtat Abel boesapon, japon aton masox namana-el. Japon Dios kastikas. Pe Dios beltaen jiw, Jesús boesapi.

**25** Samata, ¡chiekal naexasisfulde Dios jum-aechpox xamalliajwa! Wajwujajnapijiw chajiakolaxtat naexasis-el wut Moisés chajia lelpox, japi we-eli kastikaxxot. ¡Xamal naexasisfulde japon jum-aechpoxan! Xatisbej naexasis-esal wut japon jum-aechpoxan, xabich nakkastikaxaelon. **26** Dios naksiya wut pinamuxamatwujtat, japon pejjametata sat xabich najuiya. Amwutjelbej Dios jum-aech: “Asamatkoi kaes pejme that, thatbaxobej, xan tajaxtat xabich najuiyaxael” —aech Dios. **27** Dios japox jum-aech xot, asamatkoi ampathat, thatbaxobej, xabich najuiya wut, puexa Dios ispoxan ampathatat, japoxan chiekal toepaxael. Pe namaeyaxael juiyaxisalpoxankal Diosxotse. **28** Dios tato'alxotse juiyaxisal. Jaxotse pomatkoicha xatis, Dios suapich, duilaxaes. Samata, ampamatkoiyan Dios kawujajna wut, graciaschixaxaes Diosliajwa. Me-ama Dios nejxasink xatis jumchiliajwas, jumchixaxaesbej: “Xam xabich pachaemam” —chixaxaes, Dios xabich sitaens xot. **29** Me-ama jit toejow toeix, majowpi, jachixaxael, wajDios jiw babejchow kastika wut.

### **Machixaxaespox, laelpas wut ampathatat Dios nejchachaemlaliajwa xatisliajwa**

**13** Xamal, Jesús pejuwujajjan naexasitampim, ¡nakaewa nanejxasinkampox nabej nakofe! **2** Matabija-emilpi pat wuti nejbaxot, ¡nabej mastae' japi jiw chiekal bu'kulaliajwam! Chajiakolaxtat asew jiw matabija-elpi bu'kula wut, ja-aech wut, japi jiw bu'kula Dios pej-ángeles.

**3** ¡Jiw jebachantata jiaspiliajwa, xamal nejchaxoelafulde! Japiliajwa nejchaxoelam wut, ¡jum-amde: “Xanbej, me-ama najia jiw jebatat, jiaspi suapich” —amde, nejchaxoelam wut japiliajwa! ¡Nejchaxoeldebej nabijatpiliajwa asew jiw pijaxtat! Japiliajwa nejchaxoelam wut, ¡jum-amde: “Xanbej, me-ama nabijatax, japi jiw suapich” —amde, nejchaxoelam wut!

**4** Puexa jiw chiekal sitaeyaxael nakjiyax. Samata, poejiw pijowpi wulwekaxil asew watho'. Watho' pamalpiwej wulwekaxil asew poejiw. Poejiw pijowpi, japi asew watho' wulwek wut, japi poejiw Dios kastikaxaes. Watho' pamalpi wulwek wuti asew poejiw, ja-aech wut, japi watho'bej Dios kastikaxaes.



5 ¡Xabich plata nabej nejxasinke! Ma nejew wut, ido japoxankal xanejchachaemilde! ¡Ja-amde, Dios chajia jum-aech xot: “Xamal kofsaxinil tajjiwampox. Xamal tamach waelaxinil-bej” —aech xot Dios! 6 Samata, Dios xanaboejas xot, nakaewa najumchiyaxaes:

“Dios xatis nakkajachawaet. Samata, wajlewlixil, jiw asax isasia wut xatisliajwa” —nachiyaxaes nakaewaliajwa.

7 ¡Xamal chiekal nejchaxoelde majt xamal tato'alpiliajwa! ¡Asewbej, xamal naewuajanpi Dios pejjamechan, japiliajwa chiekal nejchaxoeldebej! ¡Chiekal nejchaxoeldebej japi jiwliajwa, ma-aech japi jiw, laelp wut ampathatat, is wutbejpi pachaempoxan! ¡Xamallap-is, me-ama japi, ja-amsfulde! ¡Chiekal Dios xanaboejimbej!

8 Jesucristo pomatkoicha xabich pachaempon. Asax nejchaxoela-elon. 9 ¡Xamal nabej naexasis, asew jiw xamal naewuajan wut asawuajan, Jesús pejwuajana-el wut! Kaes pejme pachaem Dios naexasisliajwam, japon xamal kajachawaesaxael xot, xamal nejxasink xoton. Asew jiw xae-el nejmachnaxaeyaxan, kaechafiach xoti. Ja-aech wut, japi pejxanaboejaxan nakiowa kaes chiekal mamnika-el Diosliajwa.

10 Moisés chajia lelpox naexasiti, japi jiw nejchaxoel: “Xatis naexasisaxaes Moisés chajia lelpox. Samata, choef xua'asaxaes templobaxot ofrenda isliajwas Diosliajwa” —aechi, nejchaxoel wut. Pe nakiowa, japi jiw Dios beltaeyaxisal. Pe naexasich wutlax Jesús tæppox xatisliajwa, jatis wut, Dios nakbu'weyaxael. 11 Puexa sacerdotespaklokolan Lugar Santísimo poxade chaxlech choefjal ofrenda isliajwa Diosliajwa, jiw babijaxan ispoxanliajwa japi bu'wuajanjilaliajwa. Pe choef, xua'ataspi, xafolipi bowaliajwa tathoetlel jiw duilxot. 12 Jatisbej Jesucristo. Paklowax tathoetlel kimatamatlas cruztat. Japon tæp wut cruztat moton puexa jiw babijaxan ispoxanliajwa, japi jiw bu'wuajanjilaliajwa Diosliajwa. 13 Jesús kimatamatlas wut tæpaliajwa paklowax tathoetlel, japox xabich padalapox. Asew jiw xatis nakjum-aech wut Jesús pejwuajan naexasichpoxliajwa: “Japawuajan naexasisliajwa xabich padalapox” —nak-aech wuti, nakiowa xatis naexasisfulaxaes Jesús pejwuajan. 14 Ampathatat ajil wajpaklowax pomatkoicha duilaliajwas. Samata, xatis wuajnewesfulaxaes asamatkoi Dios pejpaklowaxxotse pomatkoicha duilaliajwas. 15 Jesucristo tæp wut

xatisliajwa, Dios naktapa ei kawuajnalijwas Dios. Samata, xatis pomatkoicha Dios jumchiyaxaes: “Xam xabich pachaemam” —chiyaxaes. Japox jumtis wut Diosliajwa, me-ama ofrenda chaxduws wut, ja-aechox. Samata, japox pomatkoicha Dios jumchiyaxaes. **16** ¡Nabey nejkiowe' isliajwam pachaempoxan! ¡Kajachawae'lebej kijila! Japoxan isam wut, Diosliajwa, me-ama ofrenda chaxduwam wut, jachiyaxaelpox. Samata, Dios nejchaemlaxael japoxanliajwa.

**17** ¡Xamal chiekal naexasisfulde, paklochow tato'al wut! Japi paklochow kofa-el xamal tataeflafulpox. Japi chiekal matabija. Chiekal xamal tataeflafula-el wut, ja-aech wut, japi jiw pejbu'wuajna xael Diosliajwa. Samata, ¡chiekal duilaxaelam japi nejchachaemlaliaw xamallijwa! ¡Babijaxan nabey is paklochow nejxaejwasamatas xamallijwa! Babijaxan isam wut, xamallijwa pachaemaxil.

**18** ¡Xamal Dios kawuajanafulde xanallijwa! Xanal nejchaxoelx: “Xan babijax is-enil Diosliajwa, asew jiwliawabey” —an, nejchaxoelx wut. Samata, ¡xamal Dios kawuajande xanallijwa pomatkoicha chiekal duilaliaw! **19** ¡Dios kawuajandebej xan Dios natapaelijwa xamal poxaliaw! Xan nejxasinkax xamal kamtalejen pejme taeliaw.

### **Ampox carta lelpon saludos xato'apox**

**20** Dios nakkajachawaet chiekal duilaliaw, asew jiw suapich. Dios mat-et wajpaklon Jesucristo pejme dukaliaw, tæp wuton cruztat. Jawut tuadut pajelwuajan, xatis Jesús pejuajan naexasich wut nakbu'weliaw babijaxan isaspoxanliaw. ¡Japox pomatkoicha chiekal naexasisfulde! Samata, Jesús chiekal naktataeful. Me-ama oveja tataeflan chiekal pejew oveja tataeful, ja-aech Jesús, xatis naktataeful wut amwutjel, pomatkoichaliawabey. **21** Samata, Dios kawuajnax chaxduilijwa puxa xamal wewe'ppoxan, isliajwam Dios nejxasinkpoxan. Dios kawuajnaxbej nakkajachawaesliaw Jesucristo pijaxtat pachaemaliaw wajmatpuxatanxot, me-ama Dios nejxasink, jachiliaw. Pomatkoicha jumchiyaxaes Jesucristoliaw: “¡Xam xabich pachaemam!” —chiyaxaes japonliaw.

**22** Takoew, xan lelpxox xabicha-ellejen xamal naewuajnaliaw. Samata, ¡nabey naewes naewesliaw ampajamechan! **23** Xan xato'ax ampawuajan xamal chiekal matabijaliaw.

Timoteo tapaeis nakolsliajwa jiw jebaxot. Japon piach kijla-el wut, xanxot pa'an wut, buflaeyaxaelen xamal poxade xamal taeliajwam japon.

**24** ¡Nawesaludam xamal tato'alpi! ¡Nawesaludambej puexa asew jiw, japi Dios pejjiwpi, naexasiti Jesús pejwujajan! Italia tuajnujijiw xamalliajwa saludos xato'a.

**25** Xan pomatkoicha Dios kawujajmax puexa xamal kajachawaesliajwapon.